

## PROTOKOL

**sa sastanka Mješovite komisije za drumski prevoz putnika i roba između Bosne i Hercegovine i Republike Srbije  
29. i 30. maj 2018.godine, u Sarajevu**

Sastanak Mješovite komisije za drumski prevoz putnika i roba između Bosne i Hercegovine i Republike Srbije održan je u Sarajevu, 29. i 30. maja 2018.godine.

Lista članova dvije delegacije, nalazi se u prilogu ovog Protokola.

Posle razmijenjenih pozdravnih reči, dvije delegacije su usvojile sljedeći dnevni red :

- 1. Razmjena statističkih podataka o prevozu putnika i roba;**
- 2. Prevoz putnika;**
- 3. Prevoz roba;**
- 4. Ostalo.**

### **Ad. 1.**

#### ***Razmjena statističkih podataka o prevozu putnika i roba***

Dvije strane su razmijenile podatke o realizovanoj robnoj razmjeni između dvije države. Konstatovano je da je obim robne razmjene između dvije države u stalnom porastu.

Također, u ovom dijelu je delegacija Republike Srbije informisala delegaciju Bosne i Hercegovine da je, u skladu sa zakonodavstvom Republike Srbije, završen postupak ratifikacije Sporazuma između Savjeta ministara Bosne i Hercegovine i Vlade Republike Srbije o međunarodnom drumskom prevozu putnika i tereta, da je isti objavljen u Službenom glasniku Republike Srbije, br. 5/18 od 18.05.2018.godine i da se očekuje skora razmjena nota o ratifikaciji.

Bosanskohercegovačka strana je informisala delegaciju Republike Srbije da je u Bosni i Hercegovini proveden postupak ratifikacije predmetnog Sporazuma i da je isti objavljen u Službenom glasniku Bosne i Hercegovine, br. 8/17 od 10.08.2017.godine.

### **Ad. 2.**

#### ***Prevoz putnika***

Bosanskohercegovačka strana je upoznala delegaciju Republike Srbije da je donesen Pravilnik o postupku usklađivanja i registracije redova vožnje, načinu i postupku izdavanja dozvole i obrascu dozvole, kojim se uređuje postupak usklađivanja i registracije međunarodnih autobuskih redova vožnje i načinu izdavanja dozvola za obavljanje međunarodnog linijskog prevoza putnika. Pravilnik propisuje da se prijedlozi redova vožnji, koji su zaprimljeni u periodu od 1. do 30. septembra, tekuće godine, objavljuju na službenoj internet stranici

Spoljnotrgovinske komore Bosne i Hercegovine, najkasnije do 15. oktobra tekuće godine. Izuzetno, Pravilnik propisuje da se objava prijedloga redova vožnji za Republiku Srbiju, može objaviti i u drugim terminima.

Bosanskohercegovačka strana je informisala delegaciju Republike Srbije o aktivnostima koje sprovodi Ministarstvo komunikacija i transporta Bosne i Hercegovine u pogledu nadogradnje informacionog sistema, a koji će, između ostalog, imati za cilj objavljivanje podataka o registrovanim redovima vožnje.

Srpska strana je informisala delegaciju Bosne i Hercegovine o propisu kojim se uređuje postupak registrovanja redova vožnji u međunarodnom linijskom prevozu putnika.

Srpska strana je informisala da prema njihovim evidencijama linijski prevoz putnika između dvije države se obavlja u okviru 86 bilateralnih linija. Prema podacima sa kojima raspolaže bosanskohercegovačka strana linijski prevoz putnika između dvije države se obavlja u okviru 72 bilateralne linije. Shodno istom, dvije delegacije su dogovorile da će, u cilju utvrđivanja stvarnog stanja, razmjeniti podatke o održavanju linijskog prevoza putnika u skladu sa izdatim dozvolama.

Konstatovano je da, u praksi, linijski prevoz putnika između dvije države u najvećoj mjeri obavljaju bosanskohercegovački prevoznici.

Srpska strana je informisala bosanskohercegovačku stranu da je u toku procedura usaglašavanja novih redova vožnji, te da će po okončanju postupka odgovoriti bosanskohercegovačkoj strani na dostavljene zahtjeve za izdavanje novih dozvola. Također, informisala je da je 2015.godine, donesen Zakon o prevozu putnika u drumskom saobraćaju i da je puna primjena istog počela od februara 2017.godine.

U dijelu vanlinijskog naizmjeničnog prevoza putnika delegacija Republike Srbije je informisala da je od ukupnog razmijenjenog kontigenta dozvola za 2018.godinu (300 dozvola), do sada izdato 56 dozvola za obavljanje naizmjeničnog prevoza putnika. U slučaju iskazane potrebe za razmjenom dodatnog kontigenta dozvola dogovoreno je da će se isti razmijeniti na zahtjev jedne od dvije strane.

Bosanskohercegovačka strana je informisala delegaciju Republike Srbije da nadležni carinski organi Republike Srbije naplaćuju naknadu za strano vozilo bosanskohercegovačkim prevoznicima prilikom obavljanja vanlinijskog prevoza putnika.

Srpska strana je informisala bosanskohercegovačku stranu da nadležni carinski organ Republike Srbije, imajući u vidu dogovoren sistem obavljanja ove vrste prevoza bez naknade, nema osnova za postupanje po istom, te da će obavjestiti nadležni carinski organ Republike Srbije kako se nadalje ne bi vršila naplata naknade za strano vozilo prilikom obavljanja prevoza.

Dvije delegacije su se usaglasile da će uložiti napore kako bi se na graničnim prijelazima dala prednost prolaska autobusa koji obavljaju redovan linijski prevoz, u cilju olakšavanja putovanja putnicima i održavanja linije u skladu sa odobrenim redom vožnje.

Dvije delegacije su saglasne da se prilikom obavljanja bis vožnje, nakon obavljenog prevoza, prazan autobus može vratiti nazad u državu registracije nezavisno od reda vožnje odobrenog u dozvoli, uz uslov da je vožnja započeta iz zemlje registracije prevoznika.

Dvije delegacije su konstatovale da se međunarodni linijski prevoz putnika obavlja isključivo autobusima. U cilju rješavanja problema nelegalnog prevoza i rada „na crno“, dvije delegacije su saglasne da će vozilu registrovanom u drugoj državi zabraniti ulazak na svoju teritoriju, ukoliko obavlja prevoz putnika, koji po svojim karakteristikama ima sve odlike javnog prevoza (prevoz se obavlja istim ili sličnim itinererom, preko graničnog prelaza više puta u toku mjeseca sa najmanje jednim prelaskom granice u sedmici u odlasku ili dolasku, istim vozilom sa putnicima koji se ne mogu dovesti u vezu sa prevozom u nekomercijalne svrhe građana-vozača ili vlasnika vozila), a ako vozač u vozilu ne posjeduje odgovarajuće odobrenje za tu vrstu prevoza putnika.

Delegacije su saglasne da će o istom upoznati nadležne kontrolne organe dvije države.

### **Ad. 3.**

#### **Prevoz roba**

Bosanskohercegovačka strana je predložila liberalizaciju prevoza roba. Srpska strana je informisala da u ovom trenutku nije u mogućnosti da prihvati prijedlog bosanskohercegovačke strane iz do sada više puta isticanih razloga, te je konstatovala da je u prethodnim godinama, izlazila u susret zahtjevima bosanskohercegovačke strane za odobrenje dodatnog broja dozvola.

Nakon kraće diskusije dogovoreno je da se za 2018.godinu razmijeni dodatni kontingent od 50 dozvola za prevoz za/iz trećih država.

Za 2019.godinu je dogovoren kontingent od 950 dozvola za prevoze za/iz trećih država.

Srpska strana je zamolila da se za potrebe kontrole korišćenja CEMT dozvola na teritoriji Republike Srbije dostavi spisak izdatih CEMT dozvola po prevoznicima.

Obje strane su saglasne da se pitanje nesmetanog prevoza roba između država regiona dalje unapređuje unutar Transportne zajednice.

Dvije strane su dogovorile da će zajednički nastupati prema Sekretarijatu Međunarodnog transportnog foruma, kako bi se ukinula teritorijalna ograničenja u okviru CEMT multilateralne kvote.

**Ad. 4.**

**Ostalo**

Dvije delegacije su dogovorile da su sljedeće kontakt osobe ovlaštene za rješavanje operativnih pitanja:

Za Bosnu i Hercegovinu:

Miroslav Đerić, stručni savjetnik za međunarodnu saradnju

Ministarstvo komunikacija i transporta BiH

E: [miroslav.djeric@mkt.gov.ba](mailto:miroslav.djeric@mkt.gov.ba)

T: +387 33 704 551

Za Republiku Srbiju:

Bojan Dubovina, savjetnik

Ministarstvo građevinarstva, saobraćaja i infrastrukture

E: [bojan.dubovina@mgsi.gov.rs](mailto:bojan.dubovina@mgsi.gov.rs)

T: +381 11 311 42 91

Pregovori su protekli u izuzetno prijateljskoj i konstruktivnoj atmosferi.

Delegacija Republike Srbije je uputila poziv delegaciji Bosne i Hercegovine za održavanje narednog sastanka u Republici Srbiji. Datum i mjesto održavanja narednog sastanka će biti naknadno usaglašeni.

Ovaj protokol je sačinjen u dva originalna primjerka.

U Sarajevu, 30.05.2018.godine

**Za bosanskohercegovačku delegaciju**

**Zoran Andrić**

**Za srpsku delegaciju**

**Damir Edeščan**

**Članovi delegacije Bosne i Hercegovine:**

1. Zoran Andrić, pomoćnik ministra, Ministarstvo komunikacija i transporta Bosne i Hercegovine, šef delegacije,
2. Adis Šehić, glavni inspektor, Ministarstvo komunikacija i transporta Bosne i Hercegovine, član,
3. Samir Planinčić, v.d. šef odsjeka za drumski i željeznički transport, Ministarstvo komunikacija i transporta Bosne i Hercegovine, član,
4. Miroslav Đerić, stručni savjetnik, Ministarstvo komunikacija i transporta Bosne i Hercegovine, član,
5. Saša Grujić, Ministarstvo saobraćaja i veza Republike Srpske, član,
6. Sanja Rahić, Federalno ministarstvo prometa i komunikacija, član,
7. Zijad Sinanović, sekretar Udruženja međunarodnih drumskih prevoznika tereta Spoljnotrgovinske komore Bosne i Hercegovine, član,
8. Irnis Delija, sekretar Udruženja prevoznika u međunarodnom i međuentitetskom drumskom prevozu putnika Spoljnotrgovinske komore Bosne i Hercegovine, član,
9. Žarko Brković, Udruženje međunarodnih drumskih prevoznika tereta Spoljnotrgovinske komore Bosne i Hercegovine, član,
10. Borislav Gavrilović, Udruženje međunarodnih drumskih prevoznika tereta Spoljnotrgovinske komore Bosne i Hercegovine, član,
11. Ibrahim Kerla, Udruženje prevoznika u međunarodnom i međuentitetskom drumskom prevozu putnika Spoljnotrgovinske komore Bosne i Hercegovine, član i
12. Slobodanka Marčeta, Udruženje prevoznika u međunarodnom i međuentitetskom drumskom prevozu putnika Spoljnotrgovinske komore Bosne i Hercegovine, član.

**Članovi delegacije Republike Srbije:**

1. Damir Ledenčan, načelnik Odjeljenja za drumski transport, Ministarstvo građevinarstva, saobraćaja i infrastrukture Republike Srbije, šef delegacije,
2. Jelena Topalović-Kitanović, Ministarstvo građevinarstva, saobraćaja i infrastrukture Republike Srbije, član,
3. Bojan Dubovina, Ministarstvo građevinarstva, saobraćaja i infrastrukture Republike Srbije, član,
4. Vesna Đorđević, predstavnik Privredne komore Republike Srbije, član,
5. Goran Aleksić, predstavnik Udruženja prevoznika, član i
6. Nebojša Barlovac, predstavnik Udruženja prevoznika, član.